

碧城仙館詩鈔

一



叢書集成

初編

主編者
王雲五

商務印書館發行

本館據靈鷲閣叢
書本排印初編各
叢書僅有此本

碧城僊館詩鈔目錄

卷一

古今體詩八十八首

卷二

古今體詩八十七首

卷三

古今體詩七十四首

卷四

古今體詩八十八首

卷五

古今體詩七十四首

卷六

古今體詩九十七首

卷七

碧城隱館詩鈔 目錄

古今體詩一百八首

卷八

古今體詩八十七首

碧城僊館詩鈔卷一

清 錢塘陳文述雲伯撰

仿宋畫院製團扇

江南三月春風歇。櫻桃花底鶯聲滑。合歡團扇翦輕紈。分明採得天邊月。南渡丹青待詔多。傳聞舊譜出宣和。入懷休說班姬怨。羞見曾憐謝女歌。班姬謝女今何有。攜來合付纖纖手。闌前撲蝶影香遲。花閒障面徘徊久。樓臺花鳥院中春。馬畫楊題竟逼真。歌得合歡詞一曲。不知誰是合歡人。

續江醴陵雜體詩三十首

謝吏部朏省直

明星低鴛鴦。華月麗鳩鵲。仙露潤金掌。春烟羃紅藥。離宮遙鳳吹。周廬下魚鑰。蓮漏遞壺箭。蘭綺靜鈴索。嗟予淡泊人。奉官畏薄弱。爐香挹粉署。封事達黃閣。漸此鳴玉登。思得投簪作。初服踐素心。春山臥雲壑。

王事朔融遊邸

遨遊陶嘉晨。淡泊究玄理。曳裾金張門。列輦田寶里。朱門關行馬。珍木蔭新雉。藻繪麗金鋪。蘭桂馥瑤砌。圖沼鯈魚上。柔條文禽起。會食羅鼎彝。列坐覽書史。得性謝天伐。悠哉味彌旨。

江記室淹楚望

瀟湘澹無際。空水自徘徊。衡陽雁初過。巫山雲不來。斑竹美人怨。蘭芷騷人哀。蒼梧弔舜祠。章華登楚臺。荆門上明月。故宮生綠苔。簫鼓逝陳迹。羅綺紛塵埃。唐宋渺難作。望古空悠哉。

梁簡文帝綱 閨思

秋水蕩迴波。秋雲寒薄羅。空牀冷文簾。圓規銷畫娥。杏梁留燕少。珠箔飛螢多。搗衣愁逐杵。織錦淚隨梭。繁霜下玉樹。寒燼辭金荷。月生青海劍。葉落榆關戈。莫言妾夢短。夜夜在交河。

梁元帝釋 述懷

笳鼓荆門震。樓船鄂渚橫。瀟湘堪飲馬。巫峽正屯兵。雍狐衛辰蓋。燕犀出子城。桃花小隊馬。蘭葉中央旌。壯士長榆塞。將軍細柳營。銅駝晉南渡。朱鷺漢西京。擊楫祖逖志。麾扇顧榮情。各厲澄清志。終看日域平。

沈特進約 三日

令節正元已。芳期值上旬。鶯花洛陽道。車馬長安春。珠袍柘枝彈。繡幃茱萸輪。采芳槐里市。修禊蘭池濱。投壺笑玉女。捧劍出金神。流波漾卮羽。歌吹動梁塵。細雪桐花落。圓錢萍葉新。脩楊連小苑。芳樹入平津。歡娛不辭晚。遨遊貴及辰。緬茲萬壽獻。重以百福臻。年芳悵遲暮。應復眷佳人。

范僕射雲 貽友

朝出耘東田。暮歸下南岡。村墟生夕煙。平楚餘頽陽。稚子牽衣言。有客來東方。綰組復影纓。珠玑生輝光。殷勤重致辭。良久遲中堂。審聽知是君。寸心感傍徨。縞紵訂僑札。雞黍信范張。石交一窮達。古義今益彰。

附書南飛雁。夢寐同翱翔。

邱中郎遲 宴別

魚鑰開九門。鸞輿戒七萃。風清轉翠華。林長通羽騎。帷宮麗平野。鳴笳叶流吹。龍旗列玉仗。虎竹頒金瑞。名藩介弟資。重鎮淮甸寄。國典隆展親。皇眎重明試。免茲報政期。陳規申古義。

柳吳興暉 擣衣

月照蜘蛛屋。星低蟋蟀堂。殘香溫羅薦。華燭明蘭房。流雲韜絳河。清露凝紅芳。冰絃絙寶瑟。玉筯啼繁霜。霜飛冷翠幃。落落黃金徽。空房妾獨處。遠行君未歸。流黃五雜組。織素九張機。憐妾心有結。念君寒無衣。空庭夜岑寂。蟲聲出東壁。默默腸九迴。斑斑淚雙滴。尙記身短長。不知體肥瘠。擣衣復擣衣。擣衣心惻惻。惻惻復悽悽。樓頭烏夜啼。急節斷還續。繁聲高復低。織錦秦川女。停針寶氏妻。纔聞說薊北。忽又夢遼西。西北路迢遞。極目關山寒。尙恐貂裘薄。敢念鴛衾單。書託早鴻去。信盼雙魚還。秋雪龍沙夜。憐君憶妾顏。庾度支肩吾 侍宴

芳苑帷宮啓。華林帳殿開。珠旗柳外見。玉輦花間來。新豐隣鄠杜。太液接蓬萊。月駟並鑣列。風鳥平翅迴。桐乳潤宿露。草帶長春荄。萬方賜酺宴。羣工分袂盃。曼衍魚龍戲。班聯鸛鷺陪。東京繼文藻。西園思上才。陽春頌明德。終是遜鄒枚。

何水曹遜 示寮

平楚層陰合。長林晚烟聚。空江澹微波。落日隱遙樹。初月起秋旻。殘星下巖霧。斷峽猿競啼。澄潭鴈飛度。境曠絕諸妄。神清瑩百慮。漂搖古原上。疲馬識征路。雲嵐思故山。撫景時一遇。眷此壯士懷。慨焉悵遲暮。長辭石渠彥。采采木蘭露。

蕭東陽子雲望春

修陰夾槐里。香風生蘅臯。登高遠目縱。流盼春情翺。文鶯選綠樹。綺燕嬌紅桃。遊女朱輪馳。公子華纓飄。采藍中谷近。拾翠迴塘遙。寶馬嘶桂勒。畫輪引蘭橈。病臥懷藍田。眷念中心切。

虞長侍義北伐

嫖姚度絕幕。車騎出長城。長城萬餘里。落日烟塵生。暗風塞馬嘶。驚沙隴鴈鳴。玉帳起寒色。金笳沉夜聲。壯士空同劍。漢將天山旌。偃月築堅壁。長星貫敵營。闕支泣紅粉。當戶紮元纓。龍沙淨埽穴。狼望快犂庭。瀚海舊垂績。燕然新勒銘。金人朝漢闕。玉馬獻周京。靈臺方偃伯。武庫長銷兵。功成報天子。偉烈邁千齡。吳朝請均春怨。

珠簾朝日升。羅幌微風扇。金枕閒空牀。銅鋪鎖深院。綺樹初留鶯。雕櫳又來燕。衣薄寒瑤璫。袖長觸寶釧。檐柳罥紫釵。鏡花消翠鈿。曉妝愁不成。午坐繡初倦。行藥遲中庭。看花怯遙甸。芳期度寂寞。春闈等秋殿。征人萬里餘。相思那能見。欲寄隴頭書。歸程託春鴈。

徐內史悱酬友

長河迴一曲。太華削三峯。雙龍樹華闕。五鳳建曾宮。宜溫煥列宿。嶢嶢驗別風。仙波流太液。靈草植唐中。金爵觚稜上。銅盤沆瀣濃。飛甍接陽馬。複道亘雄虹。綺陌褰斜帶。金溝灞滻通。少年三輔俊。結客五陵雄。長執侍郎戟。能挽壯士弓。恥邀劇孟侶。思建嫖姚功。歸來畫麟閣。劍佩自雍容。

劉祕書孝綽 歸沐

暫容辭禁籙。休暇美遨遊。徘徊望省闕。宮觀鬱然稠。周廬滿上蘭。馳道暗長楸。金壁麗華闕。采恩隱層樓。鵷鸞翼宣室。蓬萊濫瀛洲。玉泉上文鯈。珠樹鳴春鳩。嗟予巖壑姿。羈宦心煩憂。雕龍非爽侶。吐鳳豈雄儔。世網懼見攔。初服何能酬。灞水引蘭櫓。杜陵鳴華輈。絃桐奏落日。簫鼓遲中流。未遑謝軒冕。聊以慰三秋。

劉庶子孝標 詠月

絡角長河掩。高城清漏殘。濃陰轉綠桂。微露霑紅蘭。輝分圓鏡滿。影入高樓寒。涼暈蕩珠箔。明輝流玉關。極浦雁初下。長征人未還。鄉書盼不到。寒衣寄亦難。中庭怨砧杵。孤枕夢刀鐏。龍城三五夜。應復倚弓看。

庾開府信 詠懷

橘柚南中樹。胭脂北地花。羈心悲去國。旅夢易還家。玉塞空春色。金陵幾歲華。江山懷鳳闕。風雨暗龍沙。寒聲驚朔雁。客情愁暮鴉。惟餘王粲恨。極目此天涯。

陳後主叔寶 稷飲

佳節啓宸苑。芳春遊近畿。瓊樹隱琴蓋。瑤林出畫旂。金溝綠水漲。玉殿青樽移。觴浮羽自捷。波激珠連揮。

桂月掩歌扇。蘭雲裁舞衣。簪纓美華飾。紈綺生光輝。花花各異色。燕燕自交飛。懽洽盛文藻。既醉莫言歸。

徐僕射陵

春情

暄回薄寒減。晝長春困降。草長蘼蕪村。水落芙蓉江。蛺蝶上玫瑰。蜻蜓窺畫牕。池鏡落花照。風簾來燕雙。香痕冷金鴨。燈穗消銀釭。辜芳惜日暮。何處探春茫。

沈侍中炯

自傷

蘇武悲殊域。崔駰憶舊鄉。中原異疇昔。行子意摧傷。狼望花疑雪。龍堆月似霜。金輿怨蕭瑟。玉殿動淒愴。鶯花廢苑舊。燕麥故宮荒。井邑空遺迹。河山弔夕陽。通天臺下客。祇自怨興亡。

陰常侍鐸 送別

風花迎去舳。烟水盪迴橈。遠浦歇朝雨。空江生晚潮。烟迷揚子渡。雲暗石城橋。別意滿芳樹。離情繫柳條。遊子悵行邁。羈人惜路遙。乍幸萍水合。各惜飛蓬飄。金尊薦華袖。銀箏怨綠腰。行旌隨去雁。極目駐蘭橈。

張散騎正見

汎舟

芳渚乘新漲。流波蕩畫紋。蘭橈全倚水。桂棹半圖雲。花氣風隨合。秋陰雁共分。仙靈疑汭洛。鱗鱗憶橫汾。菱謳遙渚動。蓮唱別舟聞。翠被焚香夜。還應羨鄂君。

江僕射總 羈思

寒霜晨雁急。衰柳夜烏啼。故國悲烟雨。家山泣鼓鼙。玉樹花枝斷。蒼梧雲影低。春江潮寂寂。秋閣草萋萋。

紅綃遺舊製。璧月失前題。吳語幾能慣。越吟空自悽。金陵王氣盡。還復弔青溪。

魏特進收 喜雨

油雲暗遙嶺。微風轉前庭。山中石燕舞。屋角斑鳩鳴。碧滋苑樹重。紅潤檐花輕。午陰消翠幙。夕涼生畫屏。簾櫳密絲織。池沼圓波生。聊將雲漢意。稍酬望歲情。

盧武陽思道 贈別

博望河源遠。長卿蜀道難。何如秉漢節。西去鎮秦關。金尊別酒盡。玉鑾驪歌殘。飛雨雁邊下。橫雲馬上看。明星華嶽樹。曉月黃河灣。冰開素滻動。雪霽藍田寒。茂林花定發。灞岸柳堪攀。舊里沒文礎。荒池起廢蘭。非尋金馬去。詎訪碧雞還。會邀明主賜。珪璧琢明玕。

李內史德林 銷夏

虛堂初下露。水榭自生煙。疏牕薄帷動。密樹繁陰圓。流黃珍簾滑。疊雪香羅妍。扇中秦女鳳。枝上魏宮蟬。寒綠自沉李。輕紅初上蓮。及此陶嘉日。林塘晞髮眠。

隋煬帝廣 塞宴

狼河烟不動。龍堆花自春。仙雲玉帳繞。麗日朱旗殷。單于祝曼壽。闕支稱至親。天山空事漢。長城應過秦。從今絕域外。不復祭金人。

楊楚公素 山齋

素襟避塵囂。樓山事卜筮。紅泉澄空潭。翠礪澹深谷。碧鳳馴疏桐。蒼颯響修竹。風來藥苗香。日下松陰綠。聊用適性情。非爲耽幽獨。抱琴遲素心。江湖遠高躅。

薛司隸道衡 酬憶

別緒雲霄路。羈懷江海人。嗟予猶滯洛。念子獨遊秦。秦關卽長道。望遠心如擣。花紅芳甸暄。波綠春江曉。曉夢託相思。悠悠不可期。碧落金神掌。明星玉女祠。祠前雲樹斷。采藍嗟不見。日暮憶王孫。空梁有來燕。

詠美人六首

美人如明月。三五光徘徊。露下玉階濕。風颺羅幃開。麗華桂枝曲。嫦娥明鏡臺。珍重慰寂寞。流照上青苔。
美人如碧雲。縹緲雲中君。絳河麗妙鬢。碧落敷華雲。卷衣誤秦女。迴風疑洛神。日暮盼不極。一片陽臺春。
美人如名花。可翫不可褻。穠芳豔春霞。幽姿澹秋雪。綽約束腰素。玲瓏生眼纈。懷袖拂留英。三年香不滅。
美人如香草。相得愛同心。臨疏擷芳杜。人遠瀟湘深。忘憂夙所懷。合歡匪自今。古調響空谷。哀絃彈青琴。
美人如異書。古豔無由俗。相對一樽酒。夜靜焚香讀。塵心澹欲無。勞生願亦足。努力愛華年。無事此爲福。
美人如青山。相依欲終老。秀色雙蛾眉。中隱此中好。銅疾深烟霞。凡心謝蓬島。睠茲一心人。玉顏願長保。

江南樂

江南樂。楊柳桃花滿城郭。臨水家家開畫閣。碧紗虛牕繡羅幕。玉鈎半挂眞珠箔。如花女兒花灼灼。眉影彎環腰戍削。春衫稱身身綽約。玻璃酒船門外泊。鸚鵡之箋鷓鴣杓。紅梁碧醴隨意酌。玉簫金管兩頭作。

國手無雙弄絃索。丁丁細聲私語託。晚霞銜山白日落。明燈照臉紅暈薄。鴛鴦無聲春漠漠。人生無如江南樂。

花蕊夫人詞

摩訶池上蘭橈起。雪香扇底秋如水。太平天子最風流。不愛花枝愛花蕊。翠鈿蕭條葬太華。後宮領袖屬徐家。冰肌玉骨清無汗。國色爭推解語花。香囊四角流蘇帳。幃宮彷彿前朝樣。恩重鴛鴦第一人。春風不羨羣花放。親奉蟠桃酒一杯。涼生水殿暗香來。宮詞百首追王建。絕代芳華絕世才。紅梔子綻真珠匣。累愿六鶴圍銅沓。錦地橫鋪白玉階。牙牀深鎖黃金閣。九曲龍池卅六宮。五雲高閣坐當中。錦官城郭芙蓉色。不及朝霞一鏡紅。百花潭水春波冶。芳晨從駕紛紛雅。映水龍舟島嶼中。隔花鳳輦樓臺下。豈知轉眼陣雲黃。高髻朝天兆急粧。燕子砦前無戰壘。龍神祠外失浮梁。四十萬人齊解甲。可憐馬上宮腰怯。故宮望斷不歸來。一樣傷心悲建業。慷慨猶傳應詔詩。蛾眉原不媿男兒。流傳謠語何人筆。半闕葭萌驛壁詞。故君恩重留殘畫。宜男每下張仙拜。燭影搖紅慣負心。青溪劍血尤無賴。別有嬋娟未受恩。巉巖劍閣肯捐身。黃金欲買西川錦。織出當年殉國人。蜀宮人袁蓮。花蕊夫人侍兒也。國亡。夫人入宋。袁不肯從。過劍閣。自投崖下死。其壁處石上。點點作珊瑚斑。卽靈骨所托也。見薛皆山香集。

春閨怨四言詩

金微路遠。藁砧不歸。啼鴛破夢。落花自飛。空階無人。迴風吹衣。

翫風怨

妾初奉君宴。嬌若芙蓉花。細骨復輕軀。縹緲凌飛霞。碧纒輕試鳳。香塵不霑鴉。珍珠賜百琲。舞袖生光華。妾齒日以長。君情日以疏。秋風冷後房。明月窺前除。脫我金縷衣。疊我香羅襦。聞君交州回。新得美顏姝。別起三成樓。朝日耀金鋪。置之同心帳。香囊下流蘇。贈之百寶釵。珊瑚間明珠。玉壺薦芳醴。金盤膾鯉魚。新人年幾何。十五頗有餘。玉顏願長保。君恩終不渝。

摩多樓子

長征十萬人。遠行八千里。秦山復楚山。隴水更湟水。山高水復深。日暮愁人心。西望風塵色。東流嗚咽聲。道遠夢難越。邊風與邊月。邊月照刀鐔。邊風吹馬骨。

達摩支曲

素手縲絲絲不絕。寶刀斷流流更急。今人心豈古人意。昨日花非前日色。君不見秦皇虎視何雄哉。美人置酒臨高臺。地下已看牧兒入。海上不見童男回。又不見漢武求仙乏仙骨。甲帳珠簾冷秋月。茂陵松柏摧爲薪。王母桃花又成核。

詠鏡

明鏡如明月。朝朝照面寒。曾將兩人影。同向此中看。自別秦臺鳳。常閒珠樹鸞。菱花莫輕拭。雙淚落汍瀾。

雲韞娘詞

蝶銷軟碧鳳裘綠。約髮花冠偏髻玉。絕代風流雲韞娘。天人照耀矜裝束。分明玄女握兵符。號令精嚴指臂驅。十隊分行豔氍毹。七人合伍燦氍毹。雲絲萬縷春愁疊。橫刀侍女胭脂頰。一騎紅裝趨雪馬。來迴風香散泥金蝶。曾是岑家幾葉孫。雲臺畫像拜星辰。浮家浩渺殊龍戶。林邑淵源異馬人。石峒春迴花萬樹。金釵十二敲銅鼓。天姬自結鴛鴦囊。苗女能爲鸚鵡舞。蘆管鳴鳴咒越巫。雲陽擊節祀槃瓠。枕榔麪代仇人首。勸客綢繆任小姑。兵籍分排編四姓。獐丁矯捷狼兵勁。繡卓夫人城上旗。風行娘子軍前令。關扼昆侖第幾重。松陰古路百盤通。麻蘭道遠春雲暗。榕樹門深墨瘴濃。灘江湘水烟波渡。半是騷人舊遊處。海棠橋畔少遊來。藤蔓巖前謫仙去。宜州雙鳳舊飛迴。疊綵山高銀殿開。葛令丹砂何地覓。趙王神劍至今埋。從來國色生仙境。清溪慣照娥嬌影。窈窕聲人憶綠珠祠。芳草誰尋玉環井。蛇鎗鴟箭各精良。繡面花蠻小部強。未必威名輸石砧。當年底事不勤王。南海狂生才不偶。隻身西向蠻天走。金雞究上獨看花。綠鴉山下頻攀柳。三尺枯琴太古洞。冰絃聲徹海天空。深山虞帝還祠廟。落日驩兜有故宮。荔浦蘅皋盡經歷。銅柱連天鬼門黑。祇有蛾眉解愛才。玉帳談兵煩草檄。淋漓墨瀋濕羅裙。仙洞桃花日暮雲。臺榭高寒顏太守。樓臺金碧李將軍。生平遭際悲家國。匣中寶劍青蛇色。夜雨詩寒木客吟。月明詞好斑衣織。許傍相思寨畔居。翩翩書記幸何如。奇方學治金蠶蠱。異味親嘗白妾魚。銷魂豈獨芙蓉髻。如此解人良不易。仙壇微諷杜陵詩。神嶽親藏衛公字。沉吟亦雅寶新編。雀扇珠衣望儼然。迴首蒼梧雲萬疊。夢騎北鶴訪獠僊。

秦女卷衣

鴻臺白日長。蘭池春草芳。不奉君巾烏。但卷君衣裳。羅熏亦有迹。錦薦自生香。敢拂珊瑚枕。虛窺白玉牀。還憐六宮女。從未夢容光。

愛妾換馬

蛾眉雙柳葉。駿骨一桃花。逸足飛黃阜。仙容萼綠華。龍媒長入廐。鳳髻永辭家。雖自逢知己。餘情戀正賒。

西溪水仙詞

瓊樓明月玉階花。十二珠簾卷暮霞。禮罷瑤壇歸路近。碧城原是舊兒家。小謫紅塵亦偶然。此身曾住有情天。而今綺業消除盡。管領梅花作水仙。銖衣楚楚佩珊瑚。小步天風怯暮寒。一曲冰絃響秋雪。魂銷十二曲闌干。西溪寒水碧稜稜。疏影昏黃照未曾。七十二峯殘月落。夜寒花氣半成冰。長簾空牀黯不收。燕泥零落舊香篝。昨宵跨鶴歸來處。魂斷城南舊畫樓。春雨闌珊一夢醒。燭花紅上畫羅屏。祇應月落參橫夜。消得金函一卷經。秋墳低倡鮑家詩。日暮辜芳弔竹枝。欲覓青鸞寄花葉。雨雲何處小姑祠。輕黃月落照嬌顰。澹掃蛾眉學遠山。不信迴腸如澗曲。仍流幽恨到人間。芳魂應已化寒梅。鬱鬱埋香土一坯。不盡人間兒女恨。年年花落與花開。